

1351

*Genuenses
in tres po-
tentissimas
classes uno
tempore cir-
ca Bospho-
rum prospe-
re pugna-
runt.*

illis, circa Thracium Bosphorum dimicatum. Distant
diversarum terrarum angustiae tria millia passuum a By-
zantio: hinc Europa, inde Asia est, vicinis se litto-
ribus intuentes, ita prorsus ut suspicari possis, unam
olim fuisse terram, ac terramotu quandoque abru-
ptam, arctissimam freto viam præbuisse, ut olim Cal-
pem ab Atlante abscissam, aditum oceano in medi-
terranea dedisse credidit Plato. Hujusmodi fauces, quæ
a bovinum meatibus ob brevem intercapedinem credan-
tur perviæ, Bosphorum appellant: atque eundem Thra-
cium, a terra cujus altera Bosphori ripa est. Has maris
angustias, audito hostium adventu, qui ex Calipoli no-
vissime solverant, consulto Ligur occupasse dicitur: ne,
si aperto mari commissum esset prælium, adversus tres
numerosas classes uno tempore, & velut in orbem,
pugnare cogeretur; apparebat iccirco tutius, Venetos
Hispanumque a fronte excipere, loco quidem angusto,
ubi tanta vis navium uno tempore dimicare non pos-
set: a latere vero Græcam, quæ modico negotio, si
non tam cito averti, certe sustineri posset. Atque ita
fane accidit, ut Græca classis pene intacta adhuc, ubi
cœptum est pugnari, turpiter hosti cesserit: & quasi pul-
sa, quum quadraginta longarum navium esset, domum
se trepide receperit. Levatus ea parte Ligur omnem
impetum pugnae in Venetas & Aragonias triremes, quæ
a fronte pugnabant, convertit. Cruentum hic certa-
men commissum ferunt, ac duabus horis, neutro for-
tuna inclinante, pugnatum. Verum circa occasum so-
lis, nascentem Austrum iniquiorem locum adverso fla-
tu Genuensibus fecisse: ac ne sic quoque illos loco sum-
moveri potuisset, quin obstinatius resistentes, per noctem
pugnam ciere non destitisset, citius ad unum mori,
quam cedere volentes. Veneti & ipsi suæ famæ non
obliti, parum decorum putabant, quando navium nu-
mero præstarent, ab initio non vicisse. Nam præter
quadraginta naves, quas ipsi habebant, triginta aliæ
Aragoniae gentis erant: quidam vero pauciores fuisse
ajunt: